

Amiilaamisaarnalaarnissaa amigaatigalugu

Hal: Juulleriarturneranut atuakkat tunissutissaqqissut arlalinnguit naqiterisitsisarfiit saqqummersippaat. Maana atuakkanik saqqummersitsiviit nunsinni angerlarsimaffillit ilaat 'milik publishing' meeqqanut atuakkanik saqqummersitsinissamik soqutigisalittut malunnarsiartuaarpoq, arlalinnguanimmi saqqummersitsisimalerpoq.

Juullip siorna naqitertitaanut ilaavoq Islandimiup Kristin Steinsdóttirip meeqqanut arfinilinnit qulit missaanut ukiulinnut naleqquttussiatut atuakkiaa "Engill i vesturbænum" kalaalisut taasaq "Illorsuarmi inngili". Juana Petrussen kalaallisuunngortitsisuuvoq assiliartalersorneralu Islandimiumit Halla Sólveig Thorgersdóttirimit suliaalluni. Assiliartalersornera anertuumik soqutiginarpoq, tassa quppernerit tamarluinnaasa ulikkaarlugit qaliqattarsimavai, assiliartat tassaa-lersillugit naqitap toqqavii. Tamanna atuakkap kalaallisuuani ippinnartoqalaarpoq, tassa oqaatsitta takinerat peqqutiginerlugu naqinneri isiginiarnarsisoortaramik.


Imaa naatsumik eqqartussagaanni

tassaavoq nukappiaraq Ask inissiarsuarmi arni kisiat ineqatigalugu najugalik. Najugaqataat ineqatiginngisaalli amerlaalupput kikkunersullu nukappiaqqap isiginninnera najoqqutaralugu paasiartorpavut. Ilimanarluinarpog nukappiaraq inissiarsuarmut qanittukkut nuussimasog, tassami-gooq illunnguami aappaluttumi qannga najugaqaraluarput. Inuttaani malugisassaapput ersiummernartog Amarunngortartog, ilakkuminartog Aappaluttumik nasalinnguaq Alersikkaaq, nalorninavissoq Inngili kamillaangasoq meeqqallu allat. Nukappiaqqap silarsualiussaa paasinanngitsorpassuaqarpoq, annilaanganarluni mi-anernarlunilu.

Atuagaq Islandimiutut allaqqaagaavoq, qallunaatuunngortitaasimavoq, maannalu kalaallisuumut Juana Petrussenimit nuutaalluni. Naludara allasimaqqaarnera nutserneraluunniit atorsimaneraa. Atuakkap qallunaatuua ilanngullugu atuarakku kalaallisuuani paatsuunganartitakka aatsaat iluamik paasivakka. Oqaasiliornera nutserneralumi tamarmi annerusumik uparuagassaqqanngikkaluarpoq,

oqaasiliornerami kisialluunniit eqqarsaatigigaanni sapinngisamik atuakkap anersaavanut qanillattorpoq. Paatsuunganartortaa inuiaat assigiinngitsut ersinartumik allanartumillu paasinnittarneranniippoq, immaqalu meeraanermit alliartuutigisariaqarluni.

Islandimiut kalaallillu oqaluttuatoqqaarnikkut assigiinngillat, pingaartumik ersinarsinnaasut eqqarsaatigalugit. Taaguut Amarunngortartog tusaannarlugu kalaallinut annerusumik isumaqqanngilaq oqaluttuatoqqani alior-tugaasartunilu allani immikkut ilisarnaateqqannginnami, Islandimiulli upperisapalaajutaanni Europamiorpaluttuni tassaavoq ersigisassat ilarsuat. Atuakkap qallunaatuani pineqartog paasilerpara tassaasoq 'varulv', nukappiaqqap annilaamisaarluni illorsuarmiittoq takusagaa. Oqaaseq taanna Dansk-grønlandsk Ordbogimi nutserneqarsimavoq 'inuk amarunngortartog'. Taamaannarli nutsernera suuneranut oqaasertaritissallugu amigarsorinarpoq peqqutigalugu Europa-miut oqaluttuatoqaataanni 'varulv' ersinartorsuummat, vampyrimut ila-qu-



taalluni. 'Vampyr' tassaavoq inuk toqungasoq, kisiannili unnuap qiterarnerani makilluni inuusuttut, amerlanerusutigut, aavannik milluagassarsortartog ilivermini uumanini pigittuinnarumallugu. Varulv aamma taamatukanneq pissuseqarpoq, taamalu meeqqanut oqaluttuarineqartilluni

takorluukkanik amiilaammisaarnartunik pissarsiviusassalluni. Filmit ersinartulersaarutit vampyreertallit nalinginnaaleqimmata apequtaassaaq kalaaliaqqat atuakkamik atuffanneqartut 'Amarunngortartog' paasissaneraat.

Ersinartup akerleraa 'skytsengel'

atuakkami ilanngulluni siumugassasoq. Ordbogimi qulaani taasami kalaallisuunngortitaavoq 'inngili sernisortigisaq'. Meeqqat innareernermik kingorna ersivallaarpata eqqaasinneqartarput taanna paaqqinnittusoq aammalu unnunnerani paarsisuussaasoq. Atuakkami Askip ersilernermini ikiortivissuaraa ersinaviikkut pissassuaq.

Taamaalilluni eqqarsarnartog tassaavoq oqaluttuani pineqartut tamakku Europami ersigisat sernissortillu kalaaliaqqanut paasissanersut. Annerusumik soqutigineqanngippata atuakkat taamaattut piisaat qatangiinnassapput immikkut malugisassartaqanngitsutut illutik.

Atuakkamik taama imalimmik nutserissalluni isumaliutissaq tassaavoq oqaluttuami amiilaamminartut toqgissinartullu atuartussanut ingerlaannaq paasinarnissaat. Atuakkami uani meeqqanut atuffassinermi annerusumik sunniutissanersoq nalunarpoq, immaqali nutsernerani kalaaliaqqat ersigisaat ilisarnartut oqaasertaliunneqarsinnaagaluit.

Kristin Steinsdóttir: Illorsuarmi inngili
Kalaallisut Juana Petrusen
Assiliartai Halla Sólveig Thorgeirsdóttir
Qupp. 112, akia 200 kr.
Milik publishing.

